

Melanchton,
Ein kurtzer bericht.
1624.

Vg.
3576

o. XVII, 555^c

Kat. 28^b

(Ar. 3399)





Ein kurtzer bericht zu dem durch
leuchtigen/hochgebornen fürsten/lantgraff Phi/
lipfen zu hessen zc. Warin Christliche gerech
tigkeyt steh/vnd was man von men/
schen leren vnd gebotten zu
halten schuldig sei.

Philip. Melancton.

7.




3399





BIBLIOTHECA
PONICKAVIANA



Dem Strengen/edlen/vnd vesteren/herren Hansen
Lantschaden/zü Steynnach/Ritter/seynem
gepietenden lieben herzen. Petrus harer.

Gnad/heyl/vnd fridde/in Jesu Christo vnserm herze
vnd eynigen seligmacher/mit erpietung meiner gantz
willigen/vn̄ geflissen dienste. Strenger/ edler/ vester/
gepietender lieber her. Mir ist vergägner tag/ ein trac
telin/ so der christlich vnn̄d hochberümbt Philippus
Melanchthon/ auß der Pfaltz zü Brettheyn bürtig (d̄
ewerer strenge mir vngesweifelt/in sonderheit bekant/
vnd wolwürdig mit hohem lob zu preisen) hie vor dez
durchleuchtigen/hochgepornen fürsten/ meinem gne/
digē herren Lantgraue Philipssen zu hessen/ zugschri
ben hat/inhands komen. Vnn̄d dieweil/ vom selbigen
mit kurzer/doch hochuerstendiger/sinreicher erzehlung
(als der mit vbertreffender kunst/wissenheyt vnn̄d er/
farung/ von dem almechtigen begabt) die sum̄a war
in die Christlich gerechtigkeit stee/vnd was von men/
schen leren vnd gepotten zuhaltē sei/dauon itzundt bei
nach an allen orten/zweyung/disputation/redde vnd
handlungen geübt werden/so volkümlichen vn̄ grünt
lichen angezeygt worden ist/ also das meins erachten/
fruchtbarlich/nutz vnd güte were/zu stiller hinlegung
derselbigenn/ das es meniglich besonderlichen vnsern
fürsten vnd öbern/fürken/ vnn̄d eingebildet würde/
damit sie doch zuletzt/ auß begnadung gottes/der (wie
Paulus Rom̄ .ix. meldet) wen er wil/ begnadet oder
verhärter/bewegt/vnd getriben würdē/die ding/so nit
das zergenglich/sonder das ewig/nit das irdisch/sond̄
dz himlisch/nit wollustbare reichthüben der welt/sond̄
immerwerend heylwertigkeit der selen/belangen thut
zubetrachten/zu hertzen zufassen/zuberatschlagen/vn̄

mit dapferm/Christlichem beschluß/eyn freien gang/
vnsrer lucern in der finsternis/der heylgen göttlichen
geschrifft vnd euangelions Christi zemachē/ Welches
fürwar ganz kein auffrure oder embörung erwecket/
sonder die recht warhafftige eynikeyt vnd gehorsame/
an allenn orten lernet/ Ja ein solche/das Christus des
obersten gots sone/sich selbs zu einē spigel seiner nach/
uolger(wie wol die ihenē so sich seiner nachuolgūg am
höchsten berümen/vñ seiner verwaltung am förderstē
vndernemen / im selbigen/ mit irem herrē ganz miß/
hellig erscheinē) in alles ellend/armut/ vñ gehorsame/
biß in todt hienein/ergeben gehapt/vff das/durch ver/
kündung vnd erinderūg desselbigē/fromē/gehorsame/
Christliche mensche geplantz/die dörne auß dē Rosen
gereutet vnd die freßige/reudige Böck/von den warē
einfeltigē schefflein Christi/auß dez weingart des herē
abgesondert werden möchten. So bin ich auß rechter
begirde vnd liebe/die nit das ir sucht/solchs büchlein
(Mit etlichen/von mir/vmb clarer berichts willē bei
verzeigentē Annotationen) zu verdeutschen/vñ ewer
strengkeit/als ein sonderu libhaber des göttlichē worts/
dem ich auch meines vermögens vmb souil mancher
handt erzeygte güthät/danckbarkeyt zubeweisen pflich
tig/zū dedicirn.insondheyt auch also alter gewonheyt
nach(wiewol meinthalben ein geringe/aber in betrach
tung des heuptsechers/vnd seins Christlichē inhaltts/
nit zū gar ein schlechte gab /zū eingang diß newē jars/
das vnns vnser her Christus in warer erkantnis seins
worts/vñ besserung vnser altē lebens/glückseligliche
zu verenden/gnediglichen verleihen wöl) zu vbergeben
verursacht wordē/dinstlichs vleis bittend/dasselb vō
mir/nit anders/dan wie ewer strengē alwegē gepflegē
günstiglich anzunemen/vñ im bestē zuuermercken.

Am andern tag Januarij. 1525.

Ein kurtzer bericht d̄ verneꝛveten

götlichen lere / zu dem durchleuchtigen / hoch
gepornen fürsten vonn hessenn.

Philip. Melanch.

Es ist alwegē mancherhandt weise / vom glauben od̄
dem Euangelion geurtheylt worden / wie Paulus be-
zeugt / clagende / das euangelion werde bei den Jüden
eynergermis / vnd bei den Heyden ein narheyt geachtet. i Corith. i
Nachgends so werdenn vnder denen / die darfür ange-
sehen / als ob sie gleich den glaubē vmbfangen / mēschen
erfunden / die allein auß nützarkeyten des bauchs ge-
leytet werden / dan eyn güte theyl der bischöffen vnd für-
sten / dem babst / nür vmb irs eygens nützs willen / bei-
standt beweisen / So sehen wir / vil auß dem gemeynen
volck / die der alten gebreuch vrdrüßig / vnd deshalben
dem Luthero / als ein heuptman der freihēyt / günstig
seint. Daneben werden etlich prediger / durch hoffart /
oder hoffnung zeitlichs gewins bewegt / das sie die art
der newen lere / fürtragen / vff das sie / bei dem gemeinē
hauffen / etwas herfür brechen. So reytzt die heuchlerei
etlich wenig / das sie die lere von güttē wercken beschir-
men. Aber die aller wenigsten mensche / werden verur-
sacht / auß forcht des götlichen gerichts / die warhafft-
ge / Christliche lere zuerkennē / vnd derselbigen mit an-
schickung ires lebens / nachzuuolgen.

Darvon phil.
am iij. Deren
got ist d̄ bauch
ziere. vj. Sie
hangē all des
geiz an.

Dieweil nun vnser herz Christus / mit keyner sünde / so
höchlich erzörnt wirdt / als durch verschmehung / oder
verachtūg seins Euangelions / so mus man verhütē /
das nit etwas im Lutherschē handel (wie sies nennē)
geordendt / oder gesetz werde / das dem preiß des Euan-
gelions zu widder sei / dan es ist wol wissend / was Chri-

A iij



stus den gotslesterern/dröet/da er spricht/Welcher vff
 diesen steyn felt/der wirt zerbrochē/ vnd vff wen er felt/
 der wirdt zerknitscht/fürwar in solchen hendeln sol mā
 bei der heylgen geschriftrats pflegē/wie Esaie am viij
 Cap. gebotten ist/ Zum gesetz vnd gezeugnis. 7c. Aber
 iezundt nemen sie/zu erörterung disser zwitteracht für
 die handt/die geschwechtē gwonheytē vnser voraltern/
 die vbel vstandne gschrifft der vätter/vnd das betrüg
 lich vrtheyl der vernunfft/Paulus berüfft vns zu der
 geschrifft/sprechend die geschrifft sei von gott ingeben/
 dz sie vns lere/straffe/vnd vnderweise/in denen dinge/
 die zu eym gotseligen leben gehören/Vnnd der apostell
 Petrus/heyst vns der geschrifft/als die vns in der finis
 sternis fürscheint/nachvolgen.

Matthei. xxi.
 Esa. viij. Sol
 das volck ein
 gesicht für die
 lebendigen vñ
 todten vō got
 erfordern?
 Meyn/zum ge
 gesetz. 7c.

ij Petri iij.

Es seindt zwey stuck dauon man izt zur weil am mey/
 sten disputirt vñ zweyt/Das erst/warin die Christlich
 gerechtigkeit gegründet sei/Das ander/was man vō
 menschlichen leren oder satzungen halten sol/Es seint
 jr vast vil/die bei inen darfür habenn/disser streit oder
 zwitteracht sei vñ nichts sonderlichs dan vmb etlicher
 wort willen zuthun/vnd das etlich dōrechten oder ehrt/
 süchige menschē/disse zentck vnd hädde/on alle not er
 wecken/jedoch wan der handel recht bewegē/so würde
 sich lauter erscheinen/das es grosse dapffere sachen/die
 zu erneuerung der götliche leren ganz noturfftig seiē/
 Wil herumb vom erstē stuck reddē/in welches dinge/
 meins erachtens/die Christliche gerechtigkeit/oder d
 warhafftig gottes dienst/gesetzt sei.

Im endt des Euangelions Luce/gebeutt vnns herz
 Christus/das die büße vnd nachlassung d sünde/allen
 völkern sol gepredigt werden/dauon wol abzenemen/

Luce. xxiij.

was das euangelion/oder die Christlich gerechtigkeit
sei/welch dan durch die dienstbarkeit Christi vñ seiner
aposteln/allenthalbē d̄ gāzen welt/eroffent ist wordē/
vnd herumb ist das Euangelion/eyn predig/oder ver/
kündung der büß/vñ nachlassung der sünde. Aber die
Christliche gerechtigkeit ist/wan die betrübt gewissen
im menschen/durch den glauben in Christum/erhabē
wirdt/vnd prüfet/das sie nachlassung der sünde/vmb
Christus willē erlangt hab/Solchs beschicht nit durch
ein valschen schein eyner büß/od̄ augnomen vtrawen/
sonder dieweil das Euangelion lernet die warheyt/so
verdampft es alle heuchlerei/vnd falschen schein in der
büß/vñ im glaubē. Der heylig geyst entdeckt die sünd/
erschreckt vnd betrübt das gewissen im menschen/vnd
reyt zu vertrawē/d̄ verheysung Christi/welcher cynig
für vnser sünd gnung gethan/vnd verzeihung d̄ sünde/
vmb sunst verheysen hat.

Es würdet wedd̄ die forcht des götliche gericht/s/nach
d̄z vertrawen in got/dardurch d̄z gewissen im mēschen
erquickt vnd erleucht / entpfangenn / es beweg dann
der heylig geyst das hertz/wie Christus der hertz selbs be
zeugt/ Johān. vj. Es kompt niemant zu mir/dan den
mein vatter zeucht/vñ Esaie. Es steygt nit in d̄z hertz
des menschen. zc. vnd Paulus/der naturlich mensch
begreift nit disse ding/die dem geyst gottes zugehören/
Dan ob du wol von der götlichen drew/oder vom göt/
lichenn verheys/etwas hörest/so willigt doch das hertz
mit nichtē drein/du nembst dich dessen ane wie du wöl
lest/wo nit der heilig geyst thut wirckē / oder zuscheust.
In glückseligē dingen dreumbt vns (gleich/ got sei vil
miltter/dan einer der do schwerlichen vber vns zürnen
mög/Vnd in widderwertigkeit/achten wir ine gegen

Euangelio ist

Christlich ges
rechtigt:

Rom. v.

Das gewissen
wirdt betrübt
durchs gesetz/
vñ euestiget
mitt dem suß
gelion.

Jo. xvi. Der
wirdt euch ler
nen alle ding.

Es ist keyn ge
nug thun für
die sünde dan
der todt Chris
ti/ als die ge
schrift allentz
halbeleret.

Psal. lxxv.

Esaie. liij. Er
hat vnser boß
heyt getragē.

Das ewig leb
en ist ein ga

Rom. vj.

Wen gott an-
faht den mens-
chen rechtfer-
tich zemachen
so vdambt er
ine zuuor. Vñ
wē er vff baw-
en wil/dē zer-
bricht er. Wē
er will heylen
den schlecht er
Vñ wen er wil
lebēdig mach-
en/den ertōdt
er/als gemelt
i Reg. ij. vnd
Deutr o. xxxij.
Ich werd todt
schlagen vnd
widder leben-
dig machē. vñ
Esa. lxxj. Vff
wem wirdt ru-
hen mein geist
nirgent dā vff
ein stillen dez
mütegen/vnd
d. erzittert ab
meiner rede.

Hiere. xxxj.

Joan. xvij.

Vnns vil grīmiger / dan das er vns/wie wir ioch seine
hilf anruffen /begnaden thue/ Vnd also haltē wir nint
mer mit ernst/oder warlichen dafür/das vns gott in
seiner sorg vnd pflāg hab/als disse sagten Ezech. viij.
vnd .ix. Der her sicht vns nit/der herz hat das ertrich
verlasse/iedoch d heylig geyst drückt/ nach offenbarūg
der sūnde vnnnd götlichs gericht/s ein schreckē in die ge-
wissen/ durch verkündung der büß / vnnnd erquickt sie
widumb durchs Euāgelion/ so man predigt nachlass-
ung der sūnde.

Fürter/wan das hertz/die krafft des zorns vnd d barn-
hertzigkeyt gottes erkent/so vberkompt es zuletzt eynn
warhaftigs prüfen von got/dar durch es got vdrawt/
iem glaubt/ in iene verhofft / sich iem in allen widder/
wertkeytten genzlichen ergibt oder beuilht / fürcht ine
vnnnd erkent worhafftighen das er vnser pflegt/vns
richten vñ seligen kan. Vff solche weiß/ thut der heylig
geyst/den glaubē/die forcht gottes/vnser selbs vernich-
tigung/keuscheyt/ mesigkeyt vnd dergleichen frucht/
so durch Paulum zun Gallathern. v. erzelt werdē/im
hertzen geben/vnd beschicht wie durch den propheten
Hieremiam angeredt ist/ das das gesetz nit in steynen
tafeln/sonder ins hertz/mit dem finger gottes geschrie-
ben würde. Dis ist sumarie die Euangelisch oder Cri-
stliche gerechtkeyt/eyn betrübt gewissen/dz wir durch
den glauben erschwungen werden in Christum/durch
welchē wir erkennen/die krafft der barmhertzigkeyt got-
tes. Dermassen hat Christus das ewig leben beschribē
Johan. xvij. Dis ist das ewig leben/das sie erkennen
dich eynichen got vñ den du gsandt hast Jesū Cristū.

Verner ist das ewig lebē/ eben disse gerechtkeyt die dz

euangelion verkündet/die der her Christus so blößlich
setzt/in erkantnis seins vatters vnd seiner. Aber das
heyst nit got erkennē/welches die heuchlerei vñ mensch
liche witz scheinlichenn für gibt/so es gott nennet/ Der/
gleichen ist diß nit die erkentnis gottes/wie sie gemein
lichen lernen/das man seine gepot erkenne/oder sunst
irgents eyn angenomē wone vō im helt/dañ die Jüde
erkanten auch den namen gottes/erkanten sein gesetz/
beflissen sich auch den selbē/wie die affen nachzuuolgē/
vñ dannoch verneynt Christus/das sie gott erkennen/
da er sagt Johān. viij. Er ist mein vatter & mich frei/
set/dene ir spricht/dz er sei vnser got/vnd jr habt ine nit
erkennt. Disse erkennen aber gott recht/die sein gericht
fürchten/vnd in wiederwertigen dingen/vff das sie sei
ner hilff sicherlich erwarten thun/vffrichtig bleibenn/
dan der glaub thut gepern eyn stille vnd sicherheyt im Rom. v.
hertzen/welche fürwar die kräft des freien willens/in
keinen weg verleihen kōnden/vnd ist doch heran/der al
ler warhafftigst gottes dienst/nach inhalt Psal. xliij.
Ruffe mich an im tag der trübsal/so werd ich dich er/
lossen/vñ du würdest mich eren. Er nent nit den gottes
dienst die messen od andere ceremoniē noch werck/sond
das man gott in widerwertigkeyten anruffen sol. Es
dunckt wol die vernunft/sie werd in wiederwertigen
dingen von got verlassen/vnd nit von iem angeschaut
aber & glaub bewegt dz hertz/das es von got wol haltē
thut/vnd dafür hat/got hats in seiner pfleg.

Ich habetlicher massē angeregt/war in die Christlich
oder Euangelisch gerechtigkeit sei/weysß aber wol/daz
dieß ding zum theyl düñckhel/zum theyl für eyn spott
geacht werden/aber was thustu darzu. Es hat der hey
lig Paulus/lang hieuor gemeldet/das euangelion sei

B

ij. pet. ij. Er
hat sein enge-
len mit schos-
net.

Matt. xxi.

eyn ergernis den Jüden. vnd eyn narheyt den heyden.
Doch sollen dieselben verspotter wissen. dz d̄ Christus.
diesse gots lesterer gebürlicher maß richten vnd straffe
würdet. vnd dieweil er hienoz erklet hat. in der zerstö-
rung Hierusalem. wie höchlich er sich vber die gottle-
sterer erzörnet/würde er one zweifel gar nit in solch vn-
ser gotlosigkeit falschweigend gehalten. od̄ vngestraft
hinschleichen lassen.

Sihe aber/wz grossen trost die arme betrübt gewissē/
auß dieser predig erlangen/so sie versten das dis sei die
ware gerechtigkeit/Glauben das die sünde/on vnser
gnügthun vnd verdienn freiledig durch Christum/
nachgelassen werdē/ Ich han wol etlich mensche erkēt/
die vor erkantnis differ lerē/dieweil dz gewissen durch
genügthun/vnd erdichte werck nit mag erquickt/ oder
gesichert werden/ alle hoffnung irs heyls hingelegt/die
nachmals/als das euangelium der welt heyl erschienen
ist widumb mit grossen gemüdt/die hoffnung irs heyls
bekomē/auch nit alleyn dieselb hoffnung/sond̄ auch die
Kreft od̄ macht wies die sünde entpfangē haben/souil
nützes das euangelion recht zuerkennen. Es werdenn
vil geergert so sie hören/das man dez glauben souil zu-
legt/vnd wölten lieber das die werck herfür gezogen
werden. Nun wolan wir reden nit von diesem glaubē/
des sich die vernunft scheinlichen anmast/vnd so alle
menschen gemeynlichen haben/sonder von d̄ warhaff-
tigen erkantnis gottes/die da götliche forcht vnd an-
dere gütte frucht geperen thütt/So erfordern wir eyn
sölch büßfertigkeit/die vns warliche/wo sie nit velsch-
lichen fürgeben würdet/vonn allen bösen wercken ab-
zeucht. Diffe itzt beschriben gerechtigkeit/wit Christus
haben/vnd erfordert gar nit die Ceremonien/od̄ eußer

liche Kirchen gepreuch/die weil er spricht/das reich got
tes ist vnder euch/ Deshalb er auch/die Ceremonien
Moisi/von vns nit begert/sonder hat vns dieselbē frei
gelassen/gleich wie vnser Ceremonien/als das Sacra
ment des altars/ob wirs anderst wollen.

Von menschlicher Ge rechtigkelt.

Paulus sagt/den glauben hab nit iderman/ deshalbē
auch die Christlich gerechtigkelt gemeynlichen nit al
len/sonder wenigen menschen/so got auß d welt berüft/
zukompt. Nun würstu sagen/was wiltu machen auß
den mensche/so die Christliche gerechtigkelt nit habē/
sollen sie nun irs gefallen sündigen/oder alle ding on
strefflichen würcken biß sie got bekert. Neyn in keynen
weg/dan Paulus lernet das gesetz sei den vngerechten
menschen auffgesetzt.

Herumb/ so ist nebenn der Christlichenn/ die mensch
liche gerechtigkelt/durch welche die gotlosen mensch
en gezwungen werden sollen/ Aber eyn solch gerechtig
kelt/pfleg ich ein zucht meysterei zunennē/volgt herin
dem Paulo nach der da spricht/zum Gallath.am. iij.
Das gesetz ist eyn lerneyster in Christo/vnd das kindt
sol vnder dez gesetz/als vnder fürmondern/ also lang
biß es in Christum vfferwechset/verleibē. Dis zuchtbe
schreibung/eyns zucht/od lerneysters/ist etlicher maß
eyn gerechtigkelt/die/die sirtē d menschen vnderweiste
die gewonheyten vnd menschliche sitliche tügen den be
greiffet/die kinder zum gottes dienst gewenet/ vnd das
dörecht volck/mit gütten leren vnd vbungē/von den
lastern abschreckt/wie Salamo gebeut Prouer. xxvi.

B ij

Luce xvij. Ds
reich Gottes
wirt nit komē
mit eygner vff
merkung/vn
sie werden nit
sprechen/sihe
hie oder dort
dan das reich
Gottes ist vn
der euch.

psal. lxxvij.
Sie habē mei
nem wort nit
geglaubt.

Das gesetz ist
güt. i. Thi. i. Ds
gesetz ist dē ge
rechten nit vff
gesetzt/sonder
dem vngerech
ten/vngehors
samē gotlosen
sündern.

Gal. iij

Die geysel gehört zum pferdt/das gebiß zum Esel/vñ
die rüte vff den rücken des Thoren/vnd Prouer. xvij.
Dü solt dem kinde die straff nit entziehen/dañ es wirdt
nit/wan du es mit ruten streichst/sterben.

Ro. xij.

Dise straffet
Pau. zum Ga.
v. sprechēt. Ir
seit frei/ Aber
seht zu/das ir
nicht ewer frei
heyt legt auff
die freiheytt
des fleyschs.

Hieher gehört auch die gerechtigkeit des schwerts/wel
ches/als Paulus meldet/den bösen zu eyner forcht ver
ordnet ist/vnd den guten zu eyner ere. Diffe sitliche ge
rechtigkeit/sal man fürsichtiglichen/von dem glaubē
vñ der euangelischē gerechtigkeit absondern/Wiewol
der merertheyl heudt zu tag/die euangelisch gerechtigkeit
dermassen verkünden vñnd predigen/das nur ein
newe gotlosigkeit darauff erwechst/dā etlich gotlosen
menschen/nemen sich des glaubens scheynlichen ane/
berümen sich des namens Christi/schöpffen inen etwa
eyn fleyschliche sicherheyt oder freiheyt/dardurch sie in
grosse schwere laster stürzen/vnd vermeyne/sie möge
nit gezwungen werden. Zü dem so würdt vnderlassen/
die vnderweisung der Kinder/vnd dergleichen sachen/
so doch got alle menschen/die nitt in Christo/vnd nach
schwach seint im glauben/differ zuchtmeysterei hat vn
swürffig gmacht nach der meynung Pauli zum Gal
ij. vnd. iij. Im gesetz ist gebotten gewesen/das die ze
hen gebot gottes/obwendig den hausthürē/des gleichē
an seymen der kleyder/solten geschrieben werde. Sölich
gepreuch/was seint es anders/dan ein zuchtmeysterei ge
wesen/durch welche die Kinder vñ ir gleichē gezwungē/
vnd gezeumt werden. Gepeut sich nit auch die meng
des volcks/oder die gemeyn/vff disse weiß/mit verord
neten gesetzen vnd gepreuchen/zü lernen/zü regirn/an
zuhalten/vnd zü zwingen. Ich halt dafür das etwan
die klöster/durch dissen rate/seien erbawt wordenn/das
selbst dan die Kinder/nach vermög eyner sölichen zucht

meysterei / gelernt vnnnd vnderwissen würdenn / iedoch
macht dise zuchtmeysterei / wiewol sie von got gebottē /
den menschen nit rechtfertig vor got / sond ist (als Pau
lus sagt) eynn notturfftige regell vnnnd ordenunge der
welt / die der menschlichen notturfft ersprießlichen / vn̄
gar nit verdienen mögenn die gnad / oder verzeihung
der sünde / oder das der heylig geyst dardurch erworben
werde / dā Paulus sagt zun Ephesiern. ij. Ir seint vn̄
sunst heylwertig worden durch den glauben. Wo aber
difer wone zuscheust das sollich menschlich ordenung
eynn Christlich gerechtickeit sei / daran sündigt man /
wie wir dan sehen / das dise zuchtmeysterei in clöstern /
in eynn gotlosen erdichten gottes dienst ist verwandelt
worden.

Galla. iij.
Collos. ij.
Hebre. v.

Ephes. ij.

Bis hiher hab ich mein meynung außgelegt / nun wil
ich anzeygen / wo man mißhellig ist mit den Aristote/
lischen theologen / vnnnd dasselbig vffs kürzlichst auß
richten. Die gemelten theologi lernen / Wir vermöge
durch vnser krefft vnd zuthun / die gnade / vnnnd verzei/
hung der sünde / vmb vnser gnungthun willen / verdie
nen / durch welche lere dan / das gnügthun vn̄ verdienst
Christi / warlichen verfinstert vnd vernichtet würdet.
Ey was trosts oder hoffnung sol das gewissen habenn /
wan vnser heyl oder seligkheit / an vnserm verdienst / vn̄
nit an der gnade durch Christum / hangen sol. Vn̄ also
erfordern sie / wedder in der büß / noch in der rechtfertri/
gung den heylgen geyst / sonder lassen sich an vbung der
vernunft benügen / das doch nit anderst / dan eyn laut
ter heuchlerei ist / wie Paulus bezeugt so er spricht / Es
steigt nit in das hertz des menschen .zc. Item sie seint
alsampt leer der glori gottes.

i. Chozin. ij.
Rom. ij.

Auß dem mag verstanden werden / ob die vermelt zw
B ij

tracht/alleyn der wort/ oder werck halbē sei. Das euangelion erquickt das gewissen/durch vergebliche nachlassung der sünde/vmb Christus willen. So werdē die menschen vonn den Aristotelischen schüllerern/durch ire lere/von den wercken zur verzweiffelung gedrungē. Das euangelion leret/das die hertzen durch den heyligen geyst gereynigt vnd geneuert werden/dardurch sie got erkennen/got vertrauen/vñ got fürchten/aber die Aristotelischen schüllerer vermeynen/man mög diße ding/durch heuchlerei der vernunfft volbringen/vnd dieweil das nit durch leipliche augen mag erkant werden/so ist der vnder schid herin dunckel.

Vom andern stuck.

Danonn ist zu mercken dz vñ theyll Philip. Melanch. vñ Luthero so er dem Cardinal Laurencio de capegis ghen stutgarten geschickt.

Wiewol das förderst stuck oder ort/ vil dūckeler ist dan die disputation von menschlichen sätzen/dan nocht weyß ich nit wie es kompt/das solch disputatiō/ etwas grössere vffrūre in der welt erweckenn thū zu dez das der Lūtherus diße obgemelte ding vonn vergeblicher nachlassung der sünde/vom glauben vnd d hoffnung/vil hefftiger anzeucht/vermanende/das das die sumā des Christlichen glaubens sei/ Jedoch seint vil menschen die dafür habenn/Lūtherus lere nichts anders/dan verachtung d menschlichen gesetz/vñ schetzē sich vast gots fürchtig vñ Christlich sein/wan sie in die priesterschafft vnstimiglichen wütten/oder widder gewonheyt fleysch essen/daran wil ich meine meynung auch kürzlich erzelen.

Esaiē. xxxi.

Matth. xv.

Der her sagt durch dē prophetē Esaiam/Er werde mit menschen gebottenn vergeblichenn geeret/wie dann Christus disen spruch/durch den Matheum erwidert/ deßhalben eyn grosse gotlosigkeit/eynicherley mensch

liche satzungen auffzurichten/oder zūhaltē/für eyn got-
tes dienst/oder das du durch haltung derselbigē/ magst
rechtfertig vnd früm gemacht werdē/wie dan die mey-
nung Cristi/das er vergeblichen mitt menschen gepot
geeret werde/gnungsam offenbar ist.

Danō beclagt
sich Paulus
Rom. x. sprecht
end dā als ine
die gerechtigs-
keit gotes den
wissent gewest
vñ sie gesucht
eyn eygne gez-
rechtigk eyt zū
setzen/seint sie
d̄ grechtigk eyt
gottes nit vñ
der thenig ges-
wesen.

Es seint aber etlich satzungē/die on sünde gehalten wer-
den mögen/als von der speis/von kleydungen vnd der
gleichen meren/so vffgesetzt worden seindt/da ist gnüg
von denē/nach außweisung des Euāgelions zūhaltē/
das sie nit ob sie joch gehalten oder vnderlassen werden/
mögen rechtfertigen oder schaden. Auch nach der mey-
nung Pauli/werdent nit durch satzungen vexirt/vnd
der doch vñ fridlebens willen/gleich als eyn Riegel/an
gezeygt hat tügentlichen zū halten /zwingt dich eyner
vff tausent schrit zū lauffen/so ghe mitt iem zwey tau-
sent. Item welcher in der beschneidung ist berüffen/sol
nit die fürhaut begeren/vñ der in der fürhaut ist/sol
nit die beschneidung erfordern. Neben diesen seint and̄
menschē gepot/die on sünde nit mögen gehalten werdē/
als die on lautere keuscheyt / die der Babst / so grümg-
lichen/wider got wil gehalten haben/vnangsehen das
Christus verneynt/das die keuscheyt sei meniglich ver-
liehen/zū dez auch Paulus geschrieben/es sei besser freiē/

Math. v.
i. Chozin. viij.

i. Chozin. viij.

(dā brennen.

Deshalben sollen die ihenē / die nicht vermögen solche
keuscheyt zūhalten/sich disse satzung nit anfechtē laßē/
dā es mag keyn menschlich satzung/etwas wieder dz
wort gottes ordnen/Es ist disse keuscheyt nit iderman
verlihen / so bindenn auch die gelöbde nichts in denen
dingenn/die nit mögen on sünde geleyt werden/dann
wz solt das binden/so du gelobtest eyn todtschlag zū vol-
bringen. Aber disser menschē gelübd/die keuscheyt nit
konden erhalten/oder auch dafür habē/das sie durch

i. Thimo. liij.

Mich. vij.

Sie beschirmē
eyn ander mit
gleichhelliges
güß gleich wie
sie vō andern
wollen gricht
werden / also
richten sie die
andern.

haltung irs klösterlichen lebens / gerecht fertigt werdē /
das ist sünde / darüb gebürt sich / dz man dieselbē glübd /
gantz abthue / Besündlich / dieweil Paulus öffentliche
sagt / es seint eitel lügenthafftige geyst / welche die Ehe
verpieten. Aber die forderste vnd fürnemste derselbigē
geyst / so des Babst gepot beschirmen / seint hencker vnd
trabanten / od sattelknecht / vñ gleich wie der Prophet
Michas sagt / der fürst erfordert / so willigts d Rich /
ter. Was ellenden conspiracy / o was vn seligen ver /
bündnis / so die fürsten sehen / das der Babst eyn öffent
lichen krig mit got füret / auch also hel am tag ligt / das
d Christlich glaub von iem dez babst so gantz vernicht
wirdt / wollen sie dannocht nit bewegt werden / das sie
irem eygen heyl ratten / sonder dienē vil mehr seiner on /
sinnikeyt. Fürwar es seint steyne hertzen in inen / die so
gar nit des götlichen willens warnemen.

Dauonn mag
mā lesen Phi
lip. Melanch.
In locis com
munibus / vō
menschliche ge
setze / am end /
vñ Lütke. vō
d Babloni /
sche gfencknis
vñ abthung
der Messen.

Nun ist vberentzigt / die sach vom messhalten / von der
re hie zu disputirē nit wol gezimpt / wie wol die papiste
selbs / die hantirung in messen / vnd derselben gebreuch
oder sitten / die solchen kauffmanshandel der messen be
flecken / nit wissen zu befestigē / wollen sie dannocht nit
leiden das man solchs corrigir vnd pessern thū.

Izt hastu vernomen / was ich von der ernewerten göt /
liche lere halt / vnd gar nit besorg dz dir diß mein schrei
ben beschwerliche sein wirdet / di weil sich wol gezimpt /
das man auch eyns iedē meynung / was er vom glaubē
halt / erlern. Vñ als du mich hast gheysen / die in schriff
ten zu eroffen / Abeyner sündig der das Sacramēt des
altars nit entpfahē / dauon vund nemlichen vom ge
prauch der Ceremonien / vnd von der freihēyt / dir vns
eyn gerechtigkeit macht / vnns der Ceremonienn zu /
geprauchen od nit / hat dißmals fügliche nit gehandelt

mögē werden/es wer dan das ich die gantz sache beschri-
ben het. Dan wol geacht/das mir iczt alleyn zugestan-
den hab/dich der ding/die dein heyl vnd gemeynē fridē
belangen züerindern/wie dan Horatius heyst cyn auff
sehens haben vff eyn blindenn/so derselb eym den weg
weise. Desßhalben bit ich dich laß dir diße ding/wie sie
joch seien/die ich warlicheu/mit vnderthenigem vleis
zū dir geschriben hann / Keyn verdrisß oder belestigung
sein. Dū sihst wol/mitt was ferlicher mißhellikeyt die
welt vmbethüm/beinach alleyn von den Ceremonien
vnd menschlichen sagungē/krigt vnd zandket/so doch/
wan die fürstē nür mit städtlichez ratte insehens thet/
ten/der fride wol möcht vffgericht werden. Der merer/
theyl würdt zūzeiten vff beyde seittē von den vffrürigē
predigern vmbgefürt / dan welch dem Babst mit irez
gotlosen predigē vnd heüchlen beistendig sein/dieselbē
thün nichts dan das sie die gemüter d̄ menschē ergrim-
men. So erwecken etlich valsche Lüttherischen/allent
halben vffrüre/mit irem vnnügē hedderischē geschrey/
dieweil sie sich der gemeynde/die on das/newer ding be-
girig ist/angenem zūmachen befleissen/vnnd es mag
nimer geschehen/das nitt der name des Euangelions/
also vmb eygens begirlichs gewins willen/fürgewent
werde/Dan ich hab dergleichē prediger gesehen/die ver-
neynt haben der Oberkeytt/oder iren beuelhabern/den
zehendē/ vnd andere schuldige ding/zü entrichtē. Also
vñ dieweil die fürsten/dem gemeynē nütz durch erbarn
Ratt/hilff zūbeweisen verziehen vñ seumig erschei-
entsten mittler weil/beyderseits/sölch prediger. Vñ für
war,/welche fürsten dz euangeliō/stracks zūertruckē
vndersteen/die werden nichts schaffen/dan das euang-
geliō/ist dermaße gestalt/dzes nit mag durch mensch/
liche krefft vertilgt werden. Herwiderumb/welche dez

Dise verraten
Christum mit
dem kusch/die
vnd dem schei-
des Euanges-
lion iren eygē
nütz sūchenn.

volck/ auß forcht oder dortheyt zu vil verhengē/ die wer/
den das euangelion auch nit fürdern/ sonder die vnſin
nikēyt des pöfels zu gemeynē verderben führen. vnd die/
weil d̄ merertheyl sich des götlichē worts mißbrauchē/
so verletzen oder verhindern dieselbigenn vil mehr den
preiß des euāgelions/ dan die in gleichhart widerstre/
ben. Jedoch gebürt den fürstenn zu verfügen/ daß das
euangelion heuffiglich gelernet werde/ dan so es recht
fürgetragen wirdet/ so lernt es Friden vnd rüē/ vnd er
weckt keynerley vffrüre. Danebē auch die vnſinnikēyt
des volcks zu zwingen vnd anzuhalten/ das wir durch
eyn gotloß berümen/ das euangelion wütet vnd ander
leut glück vmbzestürzen dzewet/ dan zum selbigē dra/
gen die fürsten ir schwert das sie den bösen thaten eyn
forcht vnd entsetzen seien. Geprauch nich herin der
wort Pauli. vnd warlichen ist der fride eyn vbertreff/
liche gabe gottes/ so nit erhalten werden mag wan sich
die fürsten mit verdrückung des euangelions von got
absondern. Die heylig geschriffte lobt den König Josap/
hat/ in dem/ das er leuitem/ die den glauben lernten ver
ordent. Also solten auch durch diß beispil vnser fürstē/
erbare bescheydne vnd gütte menner vff stellen/ die die
heylig geschriffte lernten. Zu dem solt man die jungenn
kinder herin/ nit verſeummenn/ dieweil dißes alter/
gleich als eyn pflanzung des gemeynen nütz ist. Wan
solt auch mit ernstlichez vleis solch künst die d̄ glaub/
od kindliche anweisung erfordert/ erhaltē. Nun wolan
diffe ding erheyschē wol eyn lenger redde/ aber ich bin
kürtzer gewesen/ angesehen/ das ich vermeyndt es ge/
büre sich nür (wie obgemeldt) dich zu vermanen vnd
herumb beuel ich dissen handel des Christlichē wesens/
deiner conscienz/ vnd so du den selben ermißest/ wöllest
vil lieber dem Josaphat/ dan dem Pharaon/ nachuoß

philip. iij.

ij. Para. xix

gen/wünschende/das vnser herz Christus/dir verleibe
einen geyst vnd willen/das aller best dir vnd deinem
heyl züraten. Mitler zeit wollest den lauff des euange-
liions nitt verhindern/ noch gegen denen/ welche
die not vnd das gewissen irgens zwingt/das
sie von Päpstliche gesetz abweichen/
thötlliche handlung fürzenemen.

Laus deo.

Anno Christiane salutis. 1524.
die 29. Decembris.

Faint, illegible text at the top of the page, possibly bleed-through from the reverse side.

Stundt- und Tag-Register
des 2. d. Buchs



29 3576


X 2206 394

nc



[Illegible text on a small, rectangular, light-colored paper label affixed to the upper right corner of the book cover.]





Ein kurtzer bericht zu dem durch
leuchtigen/hochgebornen fürsten/lantgraff Phi/
lipfen zu hessen zc. Warin Christliche gerech
tigkeyt steh/vnd was man von men/
schen leren vnd gebotten zu
halten schuldig sei.

Philip. Melancton.

7.



3399

